


四明叢書

張宗祥



石園文集

四明張氏約園開雕

序

季野先生以史學名世顧求其詩古文辭則不易得客冬馮君孟顓忽從邑中文獻會得先生遺稿二冊出羣書疑辨校讀錄入已過半未刻者惟卦變考宋遺民廣錄訂誤及書序記傳十五篇詩亦并見謝山續香舊傳未錄者祇五章其載見全傳爲此本所無者六章因補入之據劉氏行狀錄目釐爲八卷授之梓人乃爲序曰吾聞先生少不馴其父戶部君禁之室中見架上明史料大喜竊讀竟數十卷又見經學諸書復盡閱焉出而

豫諸兄家課操紙筆千言立就父兄大驚愕以爲幾失
佳子弟遂使就學踰年游梨洲黃先生之門噫異哉夫
人學問之成就豈不亦有天意哉兒童孰不喜戲跳要
其機必不可鑿苟天之命材也待其一旦觸發固沛然
莫能禦矣然杲堂李氏當日稱萬氏父子兄弟祖孫不
容口今人恆言環境若季野先生者以戶部君爲之父
公擇充宗允誠諸君爲之兄梨洲爲之師而公狄杲堂
諸老又介乎師友之間儻所謂環境皆學問者非耶先
生治學以經史爲先詩古文辭蚤歲爲之已工後乃薄

其空疏無裨世用置不爲其詔徒友也亦必以是爲言
方望溪以古文辭推有清一代大宗其治經學實自先
生啓之然先生於詩古文辭工力亦不弱古文視詩猶
勝今此編多說經論史及考辨之作諸書序記傳類客
京師時所爲亦不無少作疑有非先生所欲存者詩則
大率載見耆舊集而新樂府別有刊本此編爲其子世
標所輯藏於家者也杲堂嘗曰學通今古無所不辨吾
不如季野又曰季野古文辭識力深健不減歐曾詩亦
能窺盛唐大家之室黃梨洲則以爲俟積其胸中所有

一湧而出當盡爛然矣今先生詩古文辭之傳於世者
僅已他諸撰述又多爲人掠奪去卽明史稿號爲先生
所盡心者世亦莫能見其真本故余嘗謂先生學雖博
名雖高而志不見於當時書不盡傳於後世於清初諸
老中實最爲不幸且其經學雖深而掩於史詩古文辭
雖工而掩於經天固欲成就之而人事反又厄之如此
然則其胸中所積雖多而所謂爛然者終未嘗見於天
下後世斯固余所深慨校斯編乃每爲之掩卷嗚乎唏
已民國二十四年八月後學張壽鏞序

萬季野先生行狀

憶坊己巳冬得交萬季野先生於崑山相國京邸同晤
者爲劉子繼莊其時京師驚名之士風傳二先生博聞
爾雅學無所不窺劉則善遊每旦興必出或夕不返每
欲訪者則必託萬先生致意然後畱身以待先生則自
朝至旰一編丹鉛不置客來會者或經史制度或人物
得失閎論崇議鋒辨四出娓娓如數家珍言某人某事
如何某時某官某地建置如何檢書按之詞語未嘗少
誤客去復理前業不倦或數日一往答來者遇諸途問

之無異在萬坊以久放風塵所交四方知名士不勝屈指惟先生辨析不窮數往候之談天末數百年事一如其素所歷以是獨服膺先生稱爲未有明年崑山歸里繼莊以館俸之得鈔史館祕書無算持歸蘇之洞庭將約同志爲一代不朽之業旣歸吳不久身歿其書散失於門人交友處予與先生扼腕久之先生遂爲京江澤州所畱移置江南館中閒二年先生不自得抑抑思歸索予詩爲贈已而未果告予曰吾之衷惟君知之往歲繼莊之言不踐僕所以濡忍於此念先世九代勝國世

勦至先人中崇禎丙子鄉試於是舊業頓隳我十一世
祖斌從明太祖起兵定天下太祖知其才賜今名命長
守滁州十七年天下已定策功雖爭城野戰遜諸公然
擾攘之初闢田野固守禦吏民安堵使江淮向化雞犬
不驚厥功偉矣遂得受三等之封世襲指揮僉事洪武
五年從左副將軍文忠征進沙漠戰死阿魯渾河十世
祖鍾奉命備倭寧波於是遂爲鄞人賜第今府學之東
建文元年禦靖難師戰死大興之花園九世伯祖武年
少襲職里吏議不自甘從黔國征交趾以湔恥戰死檀

舍江時年廿三無嗣於是九世祖文遂復僉事職年廿二率舟師備倭大戰蓮花洋逐之出牛頭洋至桂門夜見二鐙懸水上遙望之以爲賊艘也引弩中之鐙息而波濤大作遭覆溺死所見之炬蓋龍目也龍怒甚攪海沈舟至今桂門有射龍將軍祠我二祖將材不恆而不得永其年文祖之死祖妣有五月遺身於是祖姑義顯日號於天求生男嗣萬氏已而果生八世祖全姑遂不嫁爲男子冠裳佐二嫂寡母以立萬氏之門至今滁州南門外有宣武祠崇禎時南太僕寺卿馮元飈所建以

祀四忠三節一義者也全三傳爲鹿園都督表公以文
章德業起世宗朝與唐應德羅達夫王汝中諸公交善
其集與表志皆諸君子所爲稱爲一代名臣是爲僕之
高祖至祖邦孚公以總兵鎮七閩彈琴雅歌意氣雍容
耄老卽引年歸里吾父棄累代戈矛之傳以文史代驅
馳崇禎之季復社所謂萬履安先生者領袖東南數十
年乙酉之秋魯監國授爲戶部主事督餉公則曰我何
以主事爲哉至於督餉濟王業小臣三百年世勳誼敢
辭乎及監國不守素業已殫攜妻子避亂奉化山中常

忍餓以食乏者蓋先人棄僕廿餘年而僕兄弟之憾至今未釋也僕兄弟八人咸各蚤自樹立念先人辭世祿勉思以文德易武功今鼎遷社改無可爲力者惟持此志上告歷祖在天耳僕生平學凡三變弱冠時爲古文詞詩歌欲與當世知名士角逐於翰墨之場旣乃薄其所爲無益之言以惑世盜名勝國之季可鑒矣已乃攻經國有用之學謂夫天未厭亂有膺圖者出舍我其誰時與諸同人兄弟自有書契以至今日之制度無弗考索遺意論其可行不可行又思此道迂遠而典考志諸

書所載有心人按圖布之有餘矣而塗山二百九十三年之得失竟無成書其君相之經營創建與有司之所奉行學士大夫之風尙源流今日失考後來者何所據乎昔吾先世四代死王事今此非王事乎祖不難以身殉爲其曾玄乃不能盡心網羅以備殘略死尙可以見吾先人地下乎故自己未以來迄今廿年間隱忍史局棄妻子兄弟不顧誠欲有所冀也凡此皆僕未白之衷君深知我故爲君詳之他日身後之狀君豈得委哉此自己巳庚午以迄戊寅十年之間雞鳴風雨談之往往

徹夜不休予初聞以爲先生姑妄言耳孰意戊寅京邸
一別遂成千古耶先生生平無他欣慕惟讀書取友以
爲終歲課程予謂其神旺氣鬱天必畱爲龜鑑以惠我
同人乃勞心過甚精神耗竭遂棄我先逝耶今日言猶
在耳而音容已不可復追遺書死後多爲輕薄所竊其
孤世標歉然慮失先生之真以予從先生京邸談最久
故乞爲狀其概如此若其生平謙退不伐矜人之長恤
人之急友愛兄弟子姪篤於親故孳孳考索并不知人
世復有何者足動其嗜好蓋古人之行而非尋常之所

得見也因括十年所聞見而筆之以告當世之知先生者知予非阿好而爲河漢之言也先生諱斯同字季野晚號石園原配莊氏繼配傅氏子一世標廩膳生孫二承祐人敵尙幼生於前明崇禎十一年正月廿四日戌時卒於康熙四十一年四月初八日辰時京邸王司空儼齋明史館中儼齋命人送柩還寧波其孤世標迎之而不遇今權厝於西郊祖塋側所著書數十種儒林宗派八卷廟制圖考四卷讀禮通考九十卷爲徐司寇乾學所纂刻於徐氏傳是樓中周正彙考八卷羣書疑辨

十二卷石經考二卷明通鑑若干卷散失明史列傳三百卷存史館中明史表十三卷明歷朝宰輔彙考八卷明史河渠考十二卷補歷代史表已刻五十三卷未刻若干卷歷代紀元彙考八卷宋季忠義錄十六卷南宋六陵遺事一卷庚申君遺事一卷崑崙河源考二卷石鼓文考一卷書學彙編二十四卷難難一卷散失詩文集八卷明樂府二卷至於表傳之作與安魂泉壤則有待於當世闡微顯幽之君子上杭同學弟劉坊頓首拜